

আমি কেমন করিয়া জানাব আমার জুড়ালো হৃদয় জুড়ালো—
 আমার জুড়ালো হৃদয় প্রভাতে ।
 আমি কেমন করিয়া জানাব আমার পরান কী নিধি কুড়ালো—
 ডুবিয়া নিবিড় গভীর শোভাতে ॥
 আজ গিয়েছি সবার মাঝারে, সেথায় দেখেছি আলোক-আসনে—
 দেখেছি আমার হৃদয়রাজারে ।
 আমি দুয়েকটি কথা কয়েছি তা সনে সে নীরব সভা-মাঝারে—
 দেখেছি চিরজনমের রাজারে ॥
 এই বাতাস আমারে হৃদয়ে লয়েছে, আলোক আমার তনুতে
 কেমনে মিলে গেছে মোর তনুতে—
 তাই এ গগন-ভরা প্রভাত পশিল আমার অণুতে অণুতে ।
 আজ ত্রিভুবন-জোড়া কাহার বক্ষে দেহ মন মোর ফুরালো—
 যেন রে নিঃশেষে আজি ফুরালো ।
 আজ যেখানে যা হেরি সকলেরই মাঝে জুড়ালো জীবন জুড়ালো—
 আমার আদি ও অন্ত জুড়ালো ॥

Parjaay: Puja, Taal: Ektaal, Raag: Ashabari-Bhairavi
 Visit www.geetabitan.com for notation and other detail